

**Ijambo rya Nyakubahwa Madame Jeannette KAGAME mu  
kiganiro cya Unity Club ku “Uruhare rw’Abayobozi mu  
gushimangira umuco w’ubworoherane n’ukuri, tugamije  
kubanisha neza abanyarwanda”**

**SERENA HOTEL, Kuwa 2 Nyakanga 2010**

**Nyakubahwa Prezida wa Senat uhagarariye Prezida wa Repubulika y'u Rwanda akaba na Prezida w'Icyubahiro wa Unity Club,**

**Ba Nyakubahwa batumirwa bacu,**

**Ba Nyacyubahiro, Nshuti, Bavandimwe Banyamuryango ba Unity Club,**

Mbanje kubashimira kuba mwitabiriye ubutumire bwacu, nkaba nejejwe cyane no kuba twongeye guteranira hano twese, mu nama ya gatatu yaguye ya Unity Club, nyuma y'izo twakoranye mu Gushyingo 2007 no muri Kamena 2008. Duhuye turi benshi, kandi twese dufite intego imwe : ***“Uruhare rw'Abayobozi mu gushimangira umuco w'ubworoherane n'ukuri, tugamije kunga no kubanisha neza Abanyarwanda”.***

Kuba twaratekereje kuri iyi gahunda ihoraho y'ibiganiro, tukiyubakira Ihuriro nk'iri, twe nk'Abanyarwanda bafite inshingano n'amahirwe byo kuyobora abandi Banyarwanda, ni uko twumva neza akamaro kabyo.

Ndizera ko ntawe utakwishimira igikorwa nk'iki ubwacyo cyo guhura, tukaganira, tugasabana, burya ngo: *“ukuli gushirira mu biganiro”*. Ihuriro nk'iri, ni amahirwe n'umwanya tuba tugize nk'abayobozi ngo twongere twisuzume, duce bugufi, dushake mu mateka y'igihugu imizi y'ikibazo, dushakemo n'ibisubizo, byubakiye ku ndangagaciro z'umuco w'Abanyarwanda.

Iri huriro ridutera ishema, nk'abayobozi bali ku isonga ry'ibikorwa bigamije kunga no kubanisha neza Abanyarwanda, mu iterambere

rirambye, tukarushaho kuzirikana ku uruhare rwacu mu kwimakaza umuco w'ubumwe n'amahoro .

Twagize amahirwe yo gukorera mu cyerekezo cyiza, mu bwisanzure no kugira gahunda zihanye z'imiyoborere, turazirikana aho tugeze, n'uko twahageze maze turusheho ukomeza kwiubakira Demukarasi, mu mutekano, ubworoherane no kubana neza mu mahoro n'iterambere.

Tuzi neza aho u Rwanda rwavuye, hatari horoshye na gato, kandi ibimaze kugerwaho muli iyi myaka ishize, ni byinshi kandi byiza . Ni ngombwa rero gukomeza gutera intambwe twirinda icyo aricyo cyose cyadusubiza inyuma kandi buri wese akabigiramo uruhare. Nta kwirara, biradusaba guhozaho, imbaraga, ubwitange no kwigomwa kwa twese, kugira ngo umuco w'ubworoherane n'ukuri usakare mu Rwanda

Nshuti-bavandimwe, Banyamuryango ba UC, namwe batumirwa bacu

***Gushimangira umuco w'ubworoherane n'ukuri, tugamije kunga no kubanisha neza Abanyarwanda,*** ntibiva mu kirere.

Twaje hano ngo twihereho, twe ubwacu nk'abayobozi, nk'abantu ku giti cyabo, nk'abagize iri huriro kugirango dusobanukirwe KUNGA n'UBWOROHERANE icyo bivuze mu gihugu nk'icyacu, kuri twebwe, mbere yo kubyunvisha abo tuyobora. Tuje hano ngo tugaruke kuri wa mucu wo gukunda UKURI, tunganire, twumve kandi twumvishe bagenzi bacu ukuri twifuza mu Banyarwanda ” dore ko uwanga amazimwe, abandwa habona”!

Nk'uko tuza kubigaragarizwa muri filime twateguye kwerekana muri iri huriro ryacu, ”My neighbor, My killer”, ukuri kurasana ntigutera impagarara, ukuri guca mu ziko ntigushya, n'ubwo kukwakira

bitabangukira buri wese, ukuri kurabohora ntikuboha. Ubworoherane bw'umunyarwanda tubugire karande kabone n'iyu tuvuga ibiremereye nko kwicirwa no kwica. Ni ahacu twe abayobozi, gufata iya mbere tukaba intangarugero.

Ngo : "*Uwambaye ikirezi ntamenya ko cyera*". Benshi mu bazirikana aho u Rwanda rwavuye, bakaba bareba aho rugeze n'uko ruhagaze uyu muni, badufitiye icyizere kuko bazi icyo byasabye ngo bigerweho ndetse n'ababyitangiye. Baratureba, badutezeho umurungo mwiza uhamye wo kugenderaho. Twibaze tuti: "Icyo cyizere Abanyarwanda badufitiye, twe turacyifitiye? Ese bo turacyibafitiye? Dukora iki, twitwara dute, tubaha ibihe bisobanuro, tubayoboye dute muri rusange ngo bigerweho?"...

Ngarutse ku biganiro bindi twagize nka Unity Club, twagiye dufata imyanzuro myinshi kandi myiza, ariko twasanze aho tugeze hagomba gushyirwaho uburyo bushya bwo gufata ibyemezo, birebana n'imikorere y'ihuriro ryacu, tukava mu byifuzo bigari, tugaha umwanya ibyemezo-ngiro, bifite umurungo-mbonera wumvikana kandi bitanga n'inzira zituma bizagerwaho. Tugashyiraho ibipimo bifatika, bizaduha kumenya aho tugeze, mu gushyira mu bikorwa ibiva muri iri huriro

Mu mikorere ya Unity Club, twasanze kandi hakenewe kongerwa ingufu, imigambi myiza dufata ikagerwaho, ikanavanwamo inyigisho zimurikira izindi nzego z'ubuyobozi ngo zishyirwe mu ngiro. Turaza kurebera hamwe uko twateza imbere imikoranire yacu n'izindi nzego, sinshidikanya kandi ko twaabigeraho, twese dufatanyije.

Mbifurije ibiganiro byubaka, Murakoze